

TEKS UCAPAN
LT. KOL. PROF. DATO' DR. KAMARUDIN HUSSIN,
REKTOR KUKUM
PERASMIAN PESTA KONVOKESYEN
PADA 20 JULAI 2006 BERTEMPAT DI PERKARANGAN KG. WAI, KUALA
PERLIS, PERLIS.

Bismillah Hirrahman Nirrahim

Assalamualaikum Warahmatullahi Taala Wabarakatuh Dan Salam Sejahtera.

Mengadap Duli Yang Maha Mulia Tuanku Syed Faizuddin Putra Ibni Tuanku Syed Sirajuddin Jamalullail, Tuanku Canselor KUKUM

Ampun Tuanku, Sembah Patik Mohon Diampun,

Patik dan seluruh warga Kolej Universiti Kejuruteraan Utara Malaysia merafak sembah, menjunjung kasih yang tidak terhingga, di atas perkenan Duli Tuanku berdua bercemar Duli berangkat ke Majlis Perasmian Pesta Konvokesyen Pertama sempena Istiadat Konvokesyen Pertama KUKUM pada malam ini.

Ampun Tuanku,

Izini patik menyampaikan ucapan kepada barisan tetamu yang dimuliakan.

Yang Amat Berhormat, Dato' Seri Shahidan bin Kassim.
Menteri Besar Perlis

Yang Berhormat Datuk-datuk dan Datin-datin,

Yang Berbahagia Prof. Dr. Ali Yeon Md Shakaff, Timbalan Rektor KUKUM
(Akademik Dan Pengantarabangsaan)

Yang Berbahagia Prof. Madya Dr. Zul Azhar Zahid Jamal Timbalan Rektor KUKUM
(Penyelidikan Dan Inovasi)

Dif-Dif Kehormat

Pegawai-Pegawai Utama KUKUM

Dekan-Dekan Dan Ketua-Ketua Jabatan KUKUM

Wakil-wakil media yang dihormati

Warga kerja dan para pelajar KUKUM yang dikasihi sekalian.

Alhamdulillah, marilah kita bersama-sama merafakkan rasa syukur ke hadrat Allah SWT yang tidak putus-putus bermurah hati memanjangkan usia, mengurniakan kesempurnaan akal, menganugerahkan kesihatan jasad dan memberikan keupayaan hingga membolehkan kita semua sekali lagi berhimpun dan bertemu dalam Majlis Perasmian Pesta Konvokesyen Pertama sempena Istiadat Konvokesyen Pertama KUKUM ini.

Terlebih dahulu, saya ingin mengucapkan ribuan terima kasih kepada barisan tetamu serta dif-dif kehormat yang telah sudi hadir ke majlis ini bagi memeriahkan lagi majlis kami pada malam ini.

Jutaan terima kasih, syabas dan tahniah diucapkan kepada Majlis Perwakilan Pelajar KUKUM dengan kerjasama Jabatan Hal Ehwal Pelajar KUKUM kerana telah bekerja keras dan bertungkus lumus dalam memastikan kelancaran majlis pada malam ini. Pengorbanan dan usaha gigih anda semua amat saya hargai. Saya percaya tanpa kerja keras dan iltizam yang sentiasa membara dalam jiwa dan sanubari setiap warga KUKUM, majlis yang besar seumpama ini sudah pasti sukar dilaksana. Ibarat kata bijak pandai, *"pisang sesikat, susu sebelanga, tanda bermuafakat bersama-sama."*

Hadirin Dan Hadirat Sekalian,

Universiti antara lain merupakan institusi penentu masa depan masyarakat dan negara. Teguh dan rapuhnya sistem masyarakat dan industri keseluruhannya akan banyak dipengaruhi oleh mahasiswa yang diharapkan dapat membimbing dan memimpin keluarga, masyarakat, industri dan generasi akan datang. Negara amat memerlukan mahasiswa yang holistik dan seimbang dalam keupayaan penggunaan potensi dan bakat diri.

Mahasiswa sewajarnya mempunyai kemahiran yang tinggi untuk menyelesaikan masalah diri dan organisasi, berperwatakan dan berperibadi mulia, mengutamakan penggunaan daya intelek, tinggi daya fikir, bersikap ilmiah semasa mengemukakan kaedah penyelesaian masalah, berupaya mengemukakan pelbagai pendekatan penguraian kemelut menurut keperluan situasi dan sebagainya. Pendek kata, harapan negara kepada mahasiswa amat tinggi kerana kepada merekalah tanggungjawab mengurus perubahan pembangunan negara bakal diserahkan.

Oleh itu dengan berteraskan tema "Mahasiswa Cemerlang, Institusi Gemilang" mahasiswa KUKUM sedang menuju ke arah kecemerlangan dalam apa jua bidang dengan kejayaan melaksanakan pesta konvokesyen pertama pada malam ini.

Mahasiswa seharusnya mampu memanfaatkan segala sumber-sumber yang ada demi memperkembangkan kebolehan dan kreativiti yang dimiliki ke tahap yang maksimum. Pesta Konvokesyen merupakan satu platform bagi mahasiswa melatih diri dalam menguruskan sesuatu program besar yang melibatkan ramai pihak bagi menyerlahkan bakat kepimpinan mereka sepanjang pelaksanaan program ini. Di samping itu, penganjuran program seperti ini dapat menyemai sikap bekerjasama dan bertanggungjawab antara sesama ahli untuk bekerja dalam satu kumpulan.

Hadirin Dan Hadirat Sekalian,

Pesta Konvokesyen Pertama KUKUM pada malam ini dikendalikan oleh pelajar-pelajar Majlis Perwakilan Pelajar KUKUM dengan kerjasama Jabatan Hal Ehwal Pelajar KUKUM. Atas gandingan ini di samping sokongan Universiti maka Pesta Konvokesyen ini menjadi realiti. Usaha seperti ini diharapkan dapat dijadikan penggerak untuk merealisasikan wawasan universiti bagi melahirkan graduan yang berketrampilan, proaktif, berpandangan terbuka dan mempunyai kemahiran berkomunikasi dan daya kepimpinan. Tahniah saya ucapakan.

Akhir kata ucapan terima kasih yang tidak terhingga sekali lagi diucapkan kepada Yang Amat Berhormat, Dato' Seri Shahidan bin Kassim, Menteri Besar Perlis dan tetamu-tetamu serta dif-dif kehormat yang lain.

Ampun Tuanku,

Sekian sahaja ucapan patik. Akhir kata sekali lagi patik ingin merafak sembah, menjujung kasih yang tidak terhingga kepada Duli Tuanku di atas perkenan berangkat ke majlis pada malam ini. Sesungguhnya kehadiran Duli Tuanku begitu besar ertinya buat kami semua. Patik sudahi dengan wabillahitaufik walhidayah wassalamualaikum warahmatullahi taala wabarakatuh.

